

Schwarz-Schilling: Vratiti ekonomska pitanja u osnovne tokove političke debate



Visoki predstavnik i specijalni predstavnik EU Christian Schwarz-Schilling danas se susreo sa Nedžadom Brankovićem, prvi put nakon njegovog stupanja na funkciju premijera Federacije Bosne i Hercegovine (FBiH).

Uviđajući da je za konstituiranje Vlade FBiH trebalo dosta vremena, visoki predstavnik i specijalni predstavnik EU je rekao: "Ta pitanja sada moramo ostaviti iza nas i moramo se usredsrediti na zadatke koji su pred nama. Drago mi je što se na čelu Vlade FBiH sada nalazi mlad i dinamičan premijer".

Na samom početku mandata, Vlada FBiH suočena je sa pitanjima koja su od ogromnog značaja za cijelu zemlju: reforma policije koja je uslov za Sporazum o stabilizaciji i pridruživanju sa EU, ustavna reforma i ispunjavanje preuzetih obaveza kako bi se osigurao održiv povratak u Srebrenicu i druga područja zemlje.

Danas se visoki predstavnik i specijalni predstavnik EU usredsredio na općenita ekonomska pitanja u Federaciji: "Viđenje javnosti je takvo da Federacija nazaduje ekonomski u odnosu na RS; Udruženje poslodavaca BiH je ovakvu zabrinutost navelo prije nekoliko sedmica", rekao je Schwarz-Schilling.

Restrukturiranje privrede Republike Srpske i program privatizacije, te inicijativa "giljotina" za uklanjanje birokratskih prepreka odaju utisak da Republika Srpska postaje

bolje mjesto za poslovanje od FBiH.

“Bez obzira da li je ovo tačno ili ne, to su ipak pitanja kojima se premijer i njegova Vlada moraju hitno pozabaviti”, rekao je visoki predstavnik i specijalni predstavnik EU.

Kao dio utvrđivanja uspješne strategije ekonomske reforme, visoki predstavnik i specijalni predstavnik EU pozvao je premijera Brankovića da učestvuje na konferenciji “Koalicija za zapošljavanje”. Konferencija, koja je planirana za 12. jun, ima za cilj da ekonomska pitanja uvede u glavne tokove političke debate i formira koaliciju za unapređenje poslovnog okruženja.

Na konferenciji će učestvovati državni i entitetski premijeri, ministri finansija, poslovni ljudi i socijalni partneri u cilju vođenja razgovora o *Povelji za zapošljavanje* koja će sadržavati osnove aktivnosti koje će vlade realizirati u sektoru razvoja poslovanja.

“Vaša Vlada, kao i drugi u Bosni i Hercegovini, mora pokazati da je spremna da preuzme odgovornost za budućnost ove zemlje”, rekao je visoki predstavnik i specijalni predstavnik EU. “Evropska unija i šira međunarodna zajednica su tu da vam pomognu, ali odgovornost za reforme leži na Vašoj Vladi i institucijama”.